

V 2
4295

Q. K.

ho
che
Ge
zu 2


1 9



Vg
4295

Zon des

Hochlöblichen / Christli-
chen Fürsten vnd Herrn / Herrn
Georgen Fürsten zu Anhalt / Grauen
zu Ascanien / Herrn zu Zerbst vnd Berns-
burg etc. Christlichem leben vnd selis-
gem abschied aus diesem jamer-
tal zur ewigen Kirchen
im Himel.



15



54

Wittemberg.



1852

[Faint, illegible text, likely bleed-through from the reverse side of the page]



[Faint, illegible text at the bottom of the page]



Dem Durch-

leuchten Hochgebornen
Fürsten vnd Herrn / Herrn Jo-
achim / Fürsten zu Anhalt / Gra-
uen zu Ascamien / Herrn zu
Zerbst vnd Bernburg etc.

meinem gnedigen Für-
sten vnd Herrn.

✱



Stets gnade
durch seinen Ein-
gebornen Son Ihes-
sum Christum vnsern
Heiland vnd war-
haftigen Helffer zu-
vor. Durchleuchter / hochgeborner /
gnediger Fürst vnd Herr / E. S. G.
selb / vnd viel fürnemer / ehrlicher
A ij Leut

Leut wissen/das ein herzliche Christo-
liche lieb gegen einander gewesen ist/
vnd one zweiucl in ewigkeit bleibet/
In dem Durchleuchtigen / hochge-
bornen Fürsten vnd Herrn / Herrn
Georgen Fürsten zu Anhalt etc. K.
S. G. geliebten Bruder / vnd in dem
Ehrwürdigen herrn Doctore Mar-
tino Luthero / Darumb nicht zweiucl
ist / so gedachter Herr Doctor / noch
in diesem Leben were / er hette selb in
offentlichen Schrifften Christliche
zeugnis von des hochgedachten Für-
sten Lere vnd Christlichen vnd fürst-
lichen tugenden / zu bestetigung der
Lere / die S. S. G. bekand haben /
vnd vielen zu gutem Exempel ausge-
hen lassen.

Dieweil aber sie beide also in wes-
nig jaren nach einander / aus diesem
schwachen leben / in die ewige Kir-
chen / zu sichtbarer anschawung Goe-
tes / zum Heiland Christo / zum heiligs-
ten Engeln / Vetern / Propheten vnd
Aposteln erfordert sind / vnd eben
jzund

szund / da newlich hochgedachter
Fürst Georg etc. aus diesem leben
seliglich abgeschrieben ist / dieses teil
der Bücher des Herrn Lutheri aus-
gehet / hab ich aus dieser vrsach zu-
gleich meldüg thun wollen / der guten
freundschaft / zwischen jnen beiden /
Denn es ist nüzlich vnd tröstlich /
szund vnd bey den Nachkomen / zu
wissen / welche ehrliche / gelarte / hohe
weit berühmte Männer in gleicher
bekentnis Christlicher warheit sind /
vñ allezeit eintrechtig geblieben sind /
damit man wisse das diese Lere nicht
ein Winckelpredigt gewesen sey / vnd
sey nicht von unbedeuchtigen Leuten
angenomen vnd ausgebreitet.

Also dienet diese meldung zu ster-
ckung in rechter lere vnd rechtem
glauben / Darnach sollen wir auch
dabey betrachten / was Christliche
Kirche ist / vnd wo sie ist / vnd das
Gottes gaben vnd werckzeug sind /
trewe Lerer vnd trewe Regenten /

A iij vnd

vnd sollen in darumb preisen vnd im
dancken / vnd vmb erhaltung der
Kirchen bitten. Denn so der Son
Gottes nicht selb die Kirchen erhielt
te / vnd in seinen henden trüge / würde
sie als bald ganz zu nichten / End-
lich dienet auch solche meldung zu
gutem Exempel / das ander in hohen
vnd nidern stenden / dieser Fürstlichen
person glauben vnd tugent folgen.

Wiewol nu der Fürstlich
Stam Anhalt sehr bekand ist /
so wil ich dennoch ein kurze
anzeigung danon erstlich thun / das
mit etlich in frembden Landen / mehr
danon wissen mögen. Das dieser
Stam der Fürsten zu Anhalt vnd
Grauen zu Ascanien / sehr alt sey / vñ
furneme weisheit vnd tugent darin
gewesen sey / sind dieses klare zeugnis.

Dem der Keiser Lotharius /
der Sechsisch / der ein seer weiser nütz-
licher Regent gewesen ist / hat dem
Alberto.

Alberto Vrso/der ein Herr zu Ballen-
stet vnd Afcanien gewesen ist / so viel
vertrawet/ das er in/als Stadhalter
vnd Heubtman vor jm in Italien
mit dem Kriegsvolck gesand hat /
der hat die vnruhe die zeit in Italien
vnd zu Rom/ mit weisheit / vnd zum
teil mit ernstlichen Schlachten ges-
stillet/ darnach ist Keiser Lotharius
gefolget / vnd weiter gezogen / vnd
die Saracenen aus dem andern teil
Italien veriagt / Vnd als die selbige
zeit / der alt Stamme der Churfür-
sten zu Brandenburg ausgestorben
ist/da hat Keiser Lotharius dem Al-
berto Vrso die Marck vnd das Chur-
fürstenthumb in der Marck geben.

Dieser Albertus hatt viel Sön-
gehabt/ deren einer genand ist Bern-
hart / der ist Keiser Fridrichs Bar-
barosse Heubtman in Italien vnd in
Deutschen Kriegen gewesen / Vnd
als Henricus der Welff / die zeit
Churfurst zu Sachsen / in die Acht

A iij gethan

gethan ist / hat Keiser Fridrich ein
teil des Lands Sachsen / vnd das
Churfürstenthumb / diesem Fürst
Bernhart geben / Vnd sind also beide
Churfürstenthumb Sachssen vnd
Brandenburg bey diesem stem An-
halt vnd Ascanien / bey zwey hundert
jaren geblieben / vnd haben diese
Fürsten löblich regiert / Deudsche
land an diesem ort wider Poln / Wens-
den / vud Behem geschützt / haben
auch Zug wider die Saracen in Asia
en gethan. Diese Herrn gehören in
das geschlecht Anhalt vnd Ascanien.

Auch ist der name Ascanien ein
anzeig eines sehr alten löblichen her-
komens. Denn die Gelerten wissen
das Josephus vnd viel andere schrei-
ben / das Ascanes der Deudschen Vas-
ter sey / wie das wort / Tuiscanes auch
anzeigt / welches also lautet / die As-
canes / Vnd hat der nam ein lieblich-
chen verstand / Priester des fewers /
Esch Cohen / vnd zeigt an / das ders-
selbig

selbig Vater der Deudschen / zum
opffern vnd predigen verordnet ge
wesen ist.

Vwer viel zu reden von
der löblichen regierung vnd
tugend vieler Fürsten zu Ans
halt / aber es ist hie zu lang / Dieses
ist allein Kurtz angezeigt / Das fremb
de nation wissen / Das hochgedachter
Fürst Georg in einem seer löblichen /
alten Fürstlichen geschlecht geboren
ist / Vnd dieweil seine eltern Fürst
Ernst vnd fürst Ernstens Gemahl
geborne Fürstin zu Münsterberg in
grosser tugend / Gottes forcht vnd
Gottes anruffung gelebt haben / ha
ben sie auch ire Sone zu Gottes er
kenntnis vnd zu tugent vffgezogen /
vnd sie in Christlicher lere / vnd an
dern löblichen Künsten vleissig vnt
erweisen lassen / vnd hat Gott dazu
diese gab geben / Das fürst Georg
einem Gottfürchtigen / gelerten / seer
trewen man Magistro Georgio Hel
ten von

A v

ten von

ten von Forchem beuolhen ist worden/
der zumor viel ander in der löblichen
Uniuersitet zu Leipzig nützlich
vnterwiesen hat.

Dieser Georgius Zelt hat den
jungen Herrn ordentlich in Latinis
scher sprach/ Grammatica vnd Dia
lectica geübet / vnd hat in im/erkent
nis vnd anruffung Gottes aus dem
Catechismo gepflanzt / vnd hat in
zu Christlicher vbung mit beten vnd
lesen / vnd aller Christlicher zucht
ernstlich gehalten / Nach dieser ers
ten Kinderlere / ist der Junge Herr
aus rat seines Vetteren fürst Adolffs/
der Bischoff gewesen zu Mersburg/
angehalten worden in Jure zu studia
ren/derhalben er etlich jar Lectiones
Juris gehöret hat/vnd hat in sonder
heit das ganz Jus Canonicum vnd
Panormitanum für vnd für vleissig
gelesen/Vnd dieweil er von Gott mit
verstand vnd geschicklichkeit zu reden
wol gezieret war / hat in der Cardis
nal

nal vnd Erzbischoff zu Mentz vnd
Meideburg / Albertus Marggraue
zu Brandenburg etc. als einen Rat/
zu der regierung im Stiffte Meides
burg gezogen / Da er vbung in den ges
richten / vnd in der Regierung bekom
men / vnd hat dabey sein wolange
fangen studium nicht vnterlassen /
vnd die vbrige zeit / nicht mit Van
cketen zugebracht / sondern hat zum
studio Juris / vnd neben Göttlicher
Schrift angefangen / Augustinum /
Petrum Longobardum / Hierony
mum / vnd Historias Ecclesie / sampt
Magistro Georgio Helten vleissig zu
lesen / Dadurch er auch vrsach genos
men / beide sprachen / Hebrean vnd
Grecan linguam zu lernen / Vnd
hat der Propheten schrift eigent
lich zu verstehen / besonder die Hebre
ische sprach wol gelernet.

Vu war die selbige zeit der streit
von Christlicher lere angefangen /
vnd hatte der Ehrwürdige Herr
Doctor

D. Martinus Luther / viel Christ-
licher vnterricht von der gnad / vom
glauben / von rechter bekerung / von
rechter anruffung / von vnterschied
warhafftiger Gottesdienst / vnd
Menschen satzungen / vom brauch
der Sacrament etc. lassen ausgehen/
nach dem der freuel Münch Tezel/
vnd ernach der Sophist Eck zu Jngs-
olstad / vnd jr anhang zu sterckung
der Ppstlichen irthumb / wider Lus-
thern viel Lester-schriefften vnd Banns-
brieff ausbreiten / dadurch Luther
die warheit zu schützen vnd mehr zu
erkleren verursacht ward.

Wiewol nu viel in allen landen/
nicht allein geringe Leut / sondern
auch gelarte vnd alte verstendige
menner Luthers schriefften annamen
vnd lobten / so hat doch hochgedach-
ter Herr / Fürst Georg / in betrach-
tung seiner jugent / an sich gehalten/
vnd hat sich in solchen wichtigen
sachen / nicht bald selb zu Richter
machen

machē wollen / hat aber alle Schrifte
beides teils vleissig gelesen / vnd das
neben Göttliche Schrifft / der alten
Kirchen historien / vnd Augustini les
re bey sich etlich jar betracht vnd bes
wogen / hat auch mit hohen vnd ges
larten Mennern / vnd sonderlich mit
hochgedachtem Cardinal vnd Erz
bischoff Alberto / der im sehr geneigt
war / viel von der Lere disputirt.

Vber das war dieses sein tegli
ches gebet vnd seuffzen zu Gott / Ah
warhafftiger Gott / Vater vnsers
Heilands Ihesu Christi / Ich bitte
dich mit ganzem hertzen / du wol
lest mich in deine Warheit leiten /
Fac cum Seruo tuo, secundum miseri
cordiam tuam, & iustificationes tuas
doce me.

Als nu fur vnd fur die warheit
mehr erkleret ward / vnd er den grund
besser erkand / wiewol er vieler grossen
Herrn vngunst / vnd viel fehrlichkeit
vor

vor augen sahe/hat er dennoch Gots
tes gebot höher geacht / vnd diese
Göttliche sprüch bedacht / 1. Corint.
10. Gliehet von Abgötterey / Vnd
Matthei am 12. Die Lestierung wis
der den heiligen Geist wird nicht vers
geben. Gal. 1. So jemand ein ander
Euangelium prediget / der sey vers
flucht.

Aus diesen vnd der gleichen Gött
lichen Sprüchen / vnd nicht aus fur
witz oder lust zu fleischlicher freiheit/
oder aus leichtfertigkeit / sondern
Gott zu ehren / vñ zu seiner seligkeit/
hat er die reine Lere/laut der Confessi
on Lutheri/ angenommen/vnd ernach
bestendiglich fur vnd fur/ so lang im
Gott das leben geben hat/ bekant/
mit teglicher anruffung des **I H E S U
X P I** Christi/mit reden/schreiben/
predigen / bestellung der Kirchen /
vnd mit viel arbeit vnd leiden das zu
pflanzung vnd erhaltung Christli
cher lere gedienet hat.

Vnd

Vnd das diese seine bekentnis
ernstlich zu Gottes ehre / vnd zu sei-
ner Seligkeit gemeint sey / hat sein
Christlich leben / vnd grosse gedult
bewiesen / Denn er fur vnd fur bis zu
seinem seligen ende in Gottes furcht /
in teglicher anruffung / in der arbeit
des studij vñ der Regierung / in vnbes-
fleckter reinigkeit seines Leibes vnd
Keuscheit / gelebt hat / hat niemand
schaden gethan / nicht vorteil ge-
sucht / nicht practiken zu vnruhe ge-
macht / hat frieden helffen machen /
zwischen hohen vnd geringen Perso-
nen / hat vielen armen Priestern /
Schulern / vnd andern gutes ge-
than / Kirchen vnd Studia gefor-
dert / hat grosse verfolgung / darin
man im nach leib vnd leben getrach-
tet / mit grosser gedult verschwie-
gen vnd heimlich getragen / Gott
zu ehren / vnd gemeinem frieden zu
gut / Er hat auch nicht newe opia-
miones / oder Sophisterey / oder vffs-
chürische getichte fantasiert / die
Christliche

Christliche lere zu vertilgen / oder zu
verblenden / oder Vffruren zu erres
gen / wie zu diesen zeiten leider mans
cherley schedliche Sophisterey vnd
anhezung zu Vffruren vor augen
sind / Sondern er ist allezeit in dieser
einigen Bekenntnis vnd form zu reden
geblieben / die in der Confession der
Sechsischē Kirchen ausgedruckt ist /
wie seine Schrifften bezeugen.

Vnd ist gewislich war / dieses
Licht in seinem verstand / vnd alle
seine tugenden sind Gottes gaben
gewesen / Darumb er aber teglich mit
grossen ernst Gott angeruffen hat /
vnd hat darinne treulich gedienet /
vnd sein pfund wol angewand / Da
rumb Gott auch gnediglich zu seiner
Regierung in Kirchen / vnd in der
Herrschaft glück vnd frieden geben
hat / Wie S. Paulus spricht / Gott
ists / der den willen gibet / vnd gibet
das volnbringen / damit etwas ges
schehe / das jm wolgefellig sey / vnd
nichts

nicht alle Menschen in schrecklicher
blindheit vnd wüten wider Gott les
ben / vnd ernach in ewige straff vnd
grimme wider Gott fallen.

Nach dem nu Fürst Georg die
reine Lere Gott zu ehren / vñ zu seiner
Seligkeit angenommen hat / vnd mit
reden vnd Schrifften bey hohen
Personen vnd andern öffentlich bes
tand hat / hat er neben den Durch
leuchten / Hochgebornen Fürsten vnd
Herrn seinen geliebten Brüdern /
Herrn Johans / vnd Herrn Joachim
Fürsten zu Anhalt / Grauen zu As
canien / Herrn zu Zerbst vnd Berns
burg etc. die Kirchen in irer Herrs
schafft / in Christliche ordnung ges
bracht / vnd sind also mit Gottes
gnaden / durch der löblichen Fürsten
eintrehtigen rat / one vnruß / vnd
one spaltungen in den Kirchen rechte
lere / vnd rechte Gottesdienst anges
richt / vnd sind viel gelarter vnd
Christlicher Prediger erfordert / vnd
S Schulen

Schulen recht bestellt / vnd ist dem
Pastorn / Kirchen vnd Schuldienern
vnterhaltung verordnet.

Ernach ist hochgedachter Fürst
Georg zur geistlichen Regierung im
Stift Mersburg erfordert / da er zu
pflanzung Christlicher lere / vnd zu
erhaltung Christlicher einigkeit im
Land zu Meissen trewlich gedienet
hat.

Vnd hat also bey zwentzig jaren
Christlich vnd seliglich gelebet vnd
gearbeit in den zweien hohen vnd nö-
tigsten Emptern / in pflanzung rei-
ner Christlicher Lere / vnd in welt-
licher regierung der Herrschafft / vnd
beweiset das werck / das er in beiden
Emptern ein gnadenreicher vnd sel-
liger werckzeug Gottes gewesen ist /
Denn ob gleich in diesem elenden
Menschlichen wesen viel gebrechen
mit vnterlauffen / so ist doch dieses
ein seliger stand / wo rechte Lere ge-
prediget

prediget wird / vnd Recht / gericht /
sucht vnd frieden in Landen erhal-
ten wird / Wie Gott solchen zimli-
chen stand in der Regierung dieser
löblichen Fürsten geben hat / Welche
die last der regierung semplich mit
grosser sorg vñ stettiger arbeit / doch
in rechter guter eintrechtigkeit vnd
brüderlicher Lieb getragen haben.

Vnd hat Fürst Georg daneben
die Studia nicht nachgelassen / son-
dern hat zum teglichen ernstlichen
gebet / fur vñ fur in Götlicher schrift
vñ andern Schrifften etwas gelesen /
hat vrteil gefasset in geistlichen vnd
weltlichen sachen / hat offte selb ges
predigt / hat etliche sehr nützliche
Schrifften lassen ausgehen / darin er
sein Confession Gott zu ehren / vnd
vielen zu sterckung an das Liecht
geben.

Vnd wiewol er offte Franck gewes-
sen / vnd durch arbeit / betrübnis /
vnd sonst geschwecht war / hat er
dennoch in den Franckheiten solch

B ij arbeit

arbeit nicht ganz fallen lassen / auch
szund in seiner letzten krankheit /
Denn er allezeit trost an Gott ge-
habt / vnd gefület hat / vnd ist ends-
lich in frölicher anruffung des HERR
XPI Christi für sich / für seine ges-
liebten Brüder vnd Vetter / für ges-
meine Kirchen / für sein Vaterland /
vnd in Christlicher bekenntnis vnd
dancfsagung / vnd in den Trostsprü-
chen / Sic Deus dilexit mundum, ut
Filium unigenitum dederit, &c. Ve-
nite ad me omnes qui laboratis &
onerati estis, &c. Nemo rapiet oues
meas ex manibus meis, aus diesem
elenden Leben in die ewige Freud ab-
geschieden.

Er hat auch ein schön Christ-
lich testament gemacht / darin er sei-
ne Confession / dancfsagung vnd an-
ruffung zu Gott erholet / vnd befel-
thut von erhaltung reiner Christli-
cher lere / vnd vffsehung vff die Kir-
chen / vnd hat nemlich einem jeden
Pastor

Pastor in den Kirchen dieses teils der
Herrschaft / welches in der teilung
im zugeteilt gewesen / jarlich einen
ganzen Wispel rocken / vnd einen
halben Wispel weizen / vnd einem jes
den Custodi sechs Scheffel rocken /
aus seinen erb gütern verordnet / mit
besondern pflichten / das solchs zu kei
ner zeit geendert werde / damit die
Pastores besser vnterhaltung haben /
vnd vleissiger sind im studio vnd pres
digen / etc.

Diese warhafftige historien von
dem löblichen vñ Christlichen Herrn /
Fürst Georgen Fürsten zu Anhalt
etc. hab ich guter meinung aus diesen
dreien vrsachen erzelet / wie wir in der
Kirchen der heiligen Personen histo
rien darumb sollen wissen vnd bes
trachten / Erstlich von wegen der
Bekentnis / das meniglich wisse / das
dieses löblichē Herrn fürst Georgen /
Fürsten zu Anhalt etc. Lere vnd Bes
kentnis gleich stimmet mit der lere

B ij

des

Des Ehrwürdigen Herrn Doctoris
Martini Lutheri / vnd das durch
hochgedachtes Fürsten bekentnis
viel gesterckt werden / Dieweil er dies
ser Lere zeugnis geben hat / so lang
er gelebt hat / vnd ist darin bestendig
blieben in mancherley verfolgung /
Vnd geben zugleich viel Christliche
herzen zeugnis / das diese Lere der
warhafftige Göttliche trost sey /
Welche durch dieses Fürsten regie-
rung / Predigt vnd Schrifften zu er-
kentnis der warheit komen sind /
Welche auch wissen / das dieser Chris-
tlich Fürst mancherley verfolgung
gehabt hat / vnd viel jar in grosser
fehrlichkeit gefessen / vnd haben bes-
funden / das in Gott wunderbarlich
geschützt vnd erhalten hat.

Im andern / sol vns betrach-
tung dieser historien zu dancksas-
gung vermanen / So offte wir im
Symbolo sprechen / Ich glaube ein
Christliche Kirche / die gemeinschafft
der

der Heiligen / sollen wir diese grosse
gnade erkennen / das der Son Got-
tes im fur vnd fur ein ewige Kirchen
im menschlichen geschlechte durchs
Euangeliū samlet / gibet etliche rech-
te vnd selige Lerer / vnd ziert sie mit
schönen gaben / wie geschrieben ist
Ephesios 4. Der Son Gottes sitzet
zur rechten hand des ewigen Vaters /
vnd gibet den Menschen gaben /
Propheten / Aposteln / Euangelisten /
Hirten vnd Lerer etc. Dieweil nu
hochgedachter Fürst Georg trewlich
vnd seliglich gearbeit hat / in beiden
Emptern / in der Lere vnd weltli-
chen Regierung / wie Esdra vnd
Nehemia vnd andere / sollen wir
erkennen / das er ein seliger werckzeug
Gottes gewesen ist / vnd sollen Gott
preisen vnd dancken fur diese gaben /
das er Lere vnd selige Regierung so
lange geben hat / hat auch zeugnis
von sich geben in vielen tugenden /
in anruffung / vnd in seliger regirung
dieses Fürsten.

B iij Vnd

Vnd sol ein jeder bey sich betrachten / das durchaus zweierley personen im Menschliche geschlecht sind / Etlich sind Vasa misericordiae, werckzeug der gnaden / welche Gott gebraucht der Kirchen vnd der Regierung zu gutem / als Joseph / David / Ezechias / Josias / Esaias / Jeremias / Daniel etc. Petrus / Paulus / Johannes / Augustinus / etc. Vnd dagegen / Vasa irae, verworffene straffgefess / als welche guten stand in der Kirchen / vnd in der Regierung zerüttten / vnd in hauffen werffen / Gottes zorn schrecklicher erregen / als Pharao / Catilina / Nero / Arius / Mahomet / etc. Tyrannen vnd Reuzer etc. Tu kan einem menschen nicht bessers widerfahren / denn das er sey ein werckzeug der gnaden / Dieses sol ein jeder mit teglichem seuffzen vnd ruffen zu Gott bitten / das dich Gott auch gnediglich wolle einen werckzeug der gnaden machen / das du in deinem beruff Gott zu lob / vnd
dir

dir vnd andern zur seligkeit lebest vnd
dienest / wie die heiligen Engel / Pros
pheten / Aposteln / die seligen Regens
ten / als Nahaman / Vnd dieses leres
vns der Son Gottes selbs in diesen
worten bitten / Dein wille geschehe /
Ah Gott hilff das alle Stend dir als
so dienen / das sie jr Ampt recht aus
richten / vnd jr arbeit dir wolgefellig
sey etc. In diesen Worten sol ein jeder
seinen beruff anschawen / vnd bedenk
cken / wie er diene / vnd bitten das er
nicht weggeworffen werde in den ver
dampfen hauffen der Zorngefess etc.
sondern das in Gott gnediglich ein
gnaden werckzeug mache.

D Im dritten / ist das Exem
pel in dieser vnd der gleichen His
torien anzuschawen / das wie
alle vns dadurch erinnern dergleis
chen vleis zuthun in vnserm beruff /
vns vben mit lesen / lernen / beten / gus
ten sitten etc. Denn wiewol die stend
vnd gaben in den Menschen nicht
B v gleich

gleich sind / vnd die nachfolgung
vnd imitatio sich nicht in allen sachen
reimet / so sind dennoch alle Mens-
chen zu den gemeinen geboten ver-
pflicht / Niemand komet zu erkentnis
Gottes on die lere / die mus man hö-
ren oder lesen / Darumb wie dieser
Fürst neben ander mancherley ar-
beit / dennoch Göttliche Schrift
für vnd für gelesen hat / vnd durch
das lesen / sein hertz zum gebet er-
weckt / also sollen wir diese vbung
auch halten. Item / wie dieser löb-
lich Fürst gedult gehabt / vnd nicht
rachgirikig gewesen / da er doch ur-
sach vnd gelegenheit hatt / also sol-
len wir auch gedult haben. Item /
wie er in reinigkeit vnd Keuscheit
gelebet / also sollen wir auch vn-
zucht fliehen etc. Vnd were gut /
das Edle vnd ander personen / Pres-
diger vnd Regenten dieses Für-
sten exempel offte betrachten vnd
folgten.

Wiewol

Wiewol nu diese Historien in
gemein allen andern zu Erinnerung
hie erzelet ist / so ist doch / durch
leuchter / hochgeborner / gnediger
Fürst vnd Herr / diese Vorrede an
E. S. G. geschrieben / denn dieses
ist der höchst trost / den vns Gott
in seiner Kirchen geoffenbaret hat /
Beati mortui, qui in Domino mori-
untur. Diueil E. S. G. wissen /
wie hie erzelet ist / das hochgedach-
ter E. S. G. geliebter Bruder Fürst
Georg / in rechter anruffung Got-
tes vnd erkenntnis des **HERREN**
Christi / vnd in gutem gewissen ges-
lebet hat / vnd in rechtem Christli-
chem trost aus dieser Welt abge-
schieden ist / vnd das sein trewe ar-
beit inn der Lere vnd Regierung
ein öffentlich zeugnis gewesen ist /
seines rechten glaubens / Vnd wiss-
sen sonst viel seiner heimlichen reden
von Göttlichem trost / so sollen E.
S. G. aus der Göttlichen regel schlief-
sen / das er bey Gott inn freuden
lebet /

lebet/vnd sollen hoffen/das **E. S. G.**
in sampt **E. S. G.** Herrn Vater/
Fraw Mutter / eltern vnd brudern da
sehen werden / vnd mit inen frölich
von allen Gottes wercken vnd gna-
den reden / Gottes weisheit in ewigs
keit lernen / vnd Gott mit frölichem
herzen dancken vnd in preisen. Dies
ser einige Christliche trost mag **E.**
S. G. wunden arznei sein. Die
gelerten Heiden haben andere man-
cherley trost gesucht / als dieweil wir
doch alle sterben müssen / vnd dieses
leben vol angst vnd not ist / so ges-
schehe diesen nicht vbel / die bald
dauon ziehen etc. Diese gemeine re-
den lasse ich fallen / wir sollen uns
an den Christlichen trost halten/
vnd dabey wissen / das wir Gott
gehorsam sein sollen / vnd das wir
nicht one Gottes rat aus dieser welt
abgefordert werden / denn also
spricht der **H. E. R. R.** / Alle har
auff ewern heubte sind gezelet
etc.

Das

Das aber sonst E. S. G. die last
irer regierung / vnd viel grosser sachen
betrachten / vnd viel betrübnis ha-
ben / weis ich kein höhern trost in als
dem grossen elend / denn dieses gros-
werck / das der Son Gottes menscha-
lich natur an sich genommen hat / das
mit Gott so ernstlich vnd klar bezeug-
get / das er grosse hertzliche lieb zu die-
ser armen menschlichen natur hat /
sorget für sie / vnd wil jr helffen. Denn
dieser Göttliche wunderbarliche rat
mus grosse vrsachen haben / vnd mus
das elend nicht gering sein / dagegen
vns ein solche grosse / gewaltige /
wunderbarliche hülffe gesandt ist /
nemlich der Son Gottes selb / der
menschlich natur an sich genommen /
das nicht dieses geschepff Gottes /
gantz vnd gar vertilget vnd zu nichte
würden / darumb treget er nu vns ar-
me schwache menschen als seine glied-
mas / wie er spricht / Er wolle vns
tragen / wie die Hirten die jungen
Lemblin in der schos tragen / die noch
nichts

nicht lauffen können / vnd wil vns
gewislich helffen / wie er mit den als
lerlieblichsten reden vns zusagt / Kom
met zu mir alle die jr in angsten vnd
nöten seid / Ich wil euch erquicken 2c.
mit diesem trost wollen sich E. S. G.
als ein Christlicher weiser Fürst ster
cken.

Auch können sich E. S. G. era
innern der Christlichen schrifften vnd
predigt / die hochgedachter E. S. G.
geliebter Bruder an E. S. G. hat
lassen ausgehen / daraus E. S. G.
der gleichen trost schepffen können /
vnd das dieselbigen schrifften mit
des Ehrwürdigen Herrn Doctoris
Martini Lutheri Lere gleich stims
men / bezeugen die Bücher die von
beiden in irem leben ausgegangen sind /
welchs meniglich zu wissen nützlich
ist. Der Allmechtige Son Gottes
Ihesus Christus / der im gewislich
ein ewige Kirchen im Menschlichen
geschlecht durchs Euangelium sam
let /

let / wolle K. S. G. gnediglich ster-
ben / vnd vielen Christlichen mens-
schen / vnd K. S. G. Landen vnd
Leuten zu gut / lange zeit in seliger
Regierung erhalten. Datum
auff den ersten tag Januarij / Anno
1554.

K. S. G.

Vntertheniger
diener

Philippus Melan-
thon.

Gedruckt zu Wittenberg
durch Georgen Rhawen
Erben.

AN ~~Handwritten scribbles~~

29 42 95

25

Pon Vg 4295

QU

ULB Halle

3

003 632 237




Inches 1 2 3 4 5 6 7 8 9 10 11 12 13 14 15 16 17 18 19 8
Centimetres

Farbkarte #13

B.I.G.

Blue Cyan Green Yellow Red Magenta White 3/Color Black



on des
den / Christli
vnd Herrn / Herrn
en zu Anhalt / Grauen
ern zu Zerbst vnd Berno
stlichem leben vnd selis
d aus diesem jamer
ewigen Kirchen
n Himel.



54

temberg.

Vg
4295

